

vice soracomito sier Lunardo Foscarini, fo Dandola, venuta a disarmar.

Item, lavorandosi il fontego di todeschi, uno che lavorava cazete zoso, et pocho stete che morite.

A dì 4, fo Santa Barbara. De more, per il principe fo cavà quelli dil quinto, à la balota d' oro, per venir a consejo. Erano scriti, di anni 20 in suso, numero 247 e rimaseno 49.

Da poi disnar fo pregadi. Et leto le infrascripte lettere:

Di Verona, di rectori, sier Alvise Malipiero et sier Francesco Bragadin, più letere. Dil zonzer li di Zuan Paulo Manfron, condutier nostro, e Lucio Malvezo; el qual Zuan Paulo vol dani etc. E hanno mandato Lucio Malvezo e domino Piero Salerno, el cavalier, cittadino di Verona, a Brentonaga, a veder quelli passi e tajar le strade etc. *Item*, esser zonti parte di provisionati dil capitano di le fantarie, et Sachozo da Spoliti et Buta Fuogo, contestabeli, con l'oro compagnie. *Item*, atendeno a far provisionati. Et dil zonzer li dil capitano di le fantarie, qual, per il sinistro di la gamba, va con crozola, et vol esser a tutto, e far la description di fanti. El qual capitano, quando passò todeschi, era a Gusingo, e di li si partì e vene li a Verona. *Item*, li elemani sono a Bozolo, come ho scritto di sopra. Et il marchexe di Mantoa à mandato a dir a essi rectori, et scritoli quello vol dir questo passar di fanti, qualli sono stalati su quel dil vescovo so barba, e si questo è stà con intelligentia di la Signoria o ver no. *Item*, avisanò nove aute di Roverè.

Di Roverè, dil podestà. Come par non sia altra adunanza cha zerecha 200 cavalli versso Bolzan, con uno nepote dil marchexe di Brandiburg. *Item*, li esser zonti Latantio con li provisionati. Et manda relation di exploratori, come il re è a presso Costanza, e si à far certa dieta; et zente in gran numero è pur a Costanza, e artilarie a Bolzan; et domino Philiberto è a presso il re, qual trata acordo con Franza.

Noto, li rectori di Verona scrissono, aver mandato a dir a Bozolo, dagino licentia a quelli fanti alemani etc.

Di Roma, di l' orator. Cosse secretissime; *nescio quid.*

Di Spagna, di Andrea Rosso, secretario, più letere date a Burgos, l' ultime di 3 novembro. Come la catholicha alteza era li con gran ubedientia di quelli Grandi di Chastiglia; e come à 'uto gran fatica aver il salvo condotto a le galie di Fian-dra, per le ripresaje etc. *Item*, la raina viola è fuora

di la terra, il re va do volte a la setimana da lei a cortizar; la raina, moglie dil re, era a Valenza et si aspètava. *Item*, dil zonzer dil gran capitano Consalvo Fernandes, contra dil qual andò il clero. Fo honorato assai. Il re li à dà uno di tre degni officij, qualli sono San Jacomo, Calatra' e l' Achantera; à 'uto San Jacomo, à d' intrada ducati 12 milia. *Item*, esso secretario à visità il reverendissimo cardinal di Toledo, qual non à altra fantasia cha preparar armata contra mori, e *continue* la prepara. El qual à scritto al papa, cessi et adati le discordie di christiani, per atender a l' impresa contra infidelli. Et altri colloquij, *ut in litteris.* *Item*, che volendo il re dal ducha di Nazara le forteze in le mano, come hanno fatto li altri, *excepto* questo, qual è stà renitente, par soa alteza mandi capitano Piero Navaro, con X milia fanti et bon numero di cavalli, contra di esso duca; et il duca de l' Infantado pretende aver il regno di Navara, che li aspeta, et si fa exerciti per questa impresa. *Item*, dil zonzer li a la corte uno orator dil re, stato a presso il re di romani; non sa quello habbi reportado etc.

Da Tunis, di sier Alvise Pizamano, capitano di le galie di Barbaria. Di successi dil viazo; et esser stà manzà da' mori do nostri merchanti, *videlicet* sier Dolfim et

Di sier Zacharia Loredam, capitano di le galie grosse, date a presso Pisa. Come va in ponente. Si duol di la galia di sier Alvise Loredam, soracommito di galia grossa bastarda, el qual non lo siegue etc.; pur anderà, *juxta* li mandati.

Di Damasco, di sier Thomà Contarini, console, di 18 octubrio. Come il soldan non vol specie vengi a Damasco, ma siano condute al Cayro. *Item*, fa preparation di armata contra portogalesi. *Item*, Sophi è contra Aliduli etc.

Di Franza, di sier Antonio Condolmer, orator nostro, date a Bles, a dì 23. Come il cardinal legato va a Roan, e anderà con lui di hordine dil re, e cussi va li altri oratori, Spagna, Hongaria etc., ch' è zornate 5 di Bles etc.

Di Milam, dil secretario. Come il gran maestro mandava altri cittadini in Franza per sospeto, e tra milanesi éra gran murmuration, e li nomina li cittadini. *Item*, che li fanti guasconi, et altri, alozavano in Milan e per li borgi. Et erano letere di monsignor di Rocha Bertim, orator dil roy a presso sguizari, come sguizari voleano far una dieta a Turich; et erano disposti de acompagnar il re a la incoronation a Roma, ma non invader guerra a niun etc., et *maxime* contra Franza.